

10. oktober 2019

UKA2019/86

Unnuisarfinnut nunatta avataaneersunut unnuisunut nunatsinni unnuinermut akitsuummik takornariaqarnermut inuussutissarsiornikkut nunatta inuinit tamanut isertitaqaataasussamik siunnerfilimmik Naalakkersuisut UKA2020 misissuinissamik peqquneqarnissaanik inatsisartut aalajangiiffissaatut siunnersuut. Misissoqquneqarluni takornariaqarnermut innarliutaasinnaangitsumik nunat allat ilinniarfigalugit aaqquissuussinissaq.

(Inatsisartuni ilaasortaq Aqqalu C. Jerimiassen, Atassut

Inatsisartunut ilaasortap Aqqalu C. Jerimiassen, Atassut –meersuup siunersuutaanut Siumumiit qujavugut

Siumut isumaqarpoq takornariaqarneq nunatsinni aningaasarsiornermut pingaaruteqarluinnartut ilagigaat. 2018 kisitsisit takutippaat suliffiit 700 miss. pilersinneqarsimasut aningaasarsiornitsinnullu 392 mio. kruuninik qaffarsaaqataallutik.

Aningaasatigut sulisoqarnikkullu inuiaqatigiinnut sunniutai assigiinngitsutigut ikorfartueqataapput.

Paasisimasatta ilagaat ukioq 2016-imi takornariartaatinut akitsuutit apparneqarnerisa kinguneraa nunatsinnut takornariatut amerlanerulernerat. Siumumiillu isumaqarpugut tamanna Naalakkersuisunit eqqumaffigineqarnera pitsaasuusoq. 2016-imiit 2018-imut qaffariaat 89 % -iuvoq.

Akitsuutinik qaffaanerup kingunerissanngilaa nunatta takornariassallugu soqutiginarunnaarneranik.

Siumumiit Naalakkersuisut isumaqatigaagut nunatsinnut takornariatartut amerlanerulernissaat anguniartariaqaratsigu. Tamannalu pissaaq takornariaqarnermik suliaqartut suleqatiginerisigut. Ullumikkut nunap immikkoortuini assigiinngitsuni takornariaqarnikkut nunaqavissut sullissisut suliaat annertusiartorput.

Siumumiit aamma qularutiginnilarput nunatsinni nunarsuarmioqatigiit eriagisassaannik akuerineqartut amerliartornerisigut takornariat assigiinngitsunik takusaqarusullutik soqutigisallit takkuttartussat amerlanerulissasut. Mittarfiit aqquuserngillu amerlanerulernerisigut takornariat amerlanerusut akikinnerusumik nunatsinnut tikittalernissaat aamma qularutiginnilarput.

Siumumiit Naalakkersuisut akuersaarnerat tunngaviatigut isumaqatigaarput. Tamanna nunatsinnut takornariatartut ikilinerannik kinguneqassanngippat. Taamaattumik peqqissaartumik misissuisoqarnissaa kissaatigaarput. Naatsorsaatigaarput tamanna ataatsimiititaliami susassaartumi takornariaqarnermut attuumassuteqartut peqatigalugit suliarineqassasoq. Siumumiit pingaartipparput takornariatitsisartut aamma mikisunik taaneqartartut tusaaneqarluarnissaat.

Siumut isumaqarput takornariaqarnikkut isertitarisinnaasagut ujartorneqartuartariaqartut. Tamannalu



pissanganartutut isigaarput. Siumumiit angorusupparput, soorlu umiarsuartigut takornariartut aningaasat inuttut ataatsimut atugaat innarlingikkaluarlugu inuiaqatigiinnut kalaallinut annertunerusumik pisisarnerisigut anguneqarsinnaasoq. Soorlu massakut takusarpagut assersuutigalugu neriffissanngoraangat amerlasuut umiarsuarnut neriartortartut. Amerlanerusut inoqarfinni neriniartarfinnik atuinerisigut qularutissaanngitsunik aningaasanik amerlanernik isaatitsinermut iluaqutaassapput.

Taamatut oqaaseqarluta suliap ataatsimiititaliamut ingerlatinnissaa kissaatigaarput.

Hermann Berthelsen, Siumut.